

Boccalini

Ausschnitte aus dem Programm 2010

S'isch egal wär ma im Frühling in d'Regierig wählt.
Macht dä z'Muul uf – merksch, dass ds'Hirni fäält.
Und gebtis eina, wo ds'Hirni nit tuat fääla,
jo denn kasch sicher si, dä tätti niamart wähla!

Näbadura zwüschadura änadura, hinadura.
Das isch doch birawaich, so irgendwo denn dura.
Hend Sie verrota was das isch – ojeeminee.
Das isch ds'Parteiprogramm vor Schwiizer CVP.

Wo anna mit am Geld? Alegga wia dia Riicha?
D'Banka steckands grad in Sand, tüand nüt dr gliicha.
Gib ds Geld doch üs brava Schnitzelbanka,
was au passiert, bi üs tuat ds'Bankgheimnis nit wanka.

Wenn ma üsra Kinder iahri Jugend nit will rauba,
tuat ma ihna z'Stimma mit 16-i nit erlauba.
Dabi wärs nötig, dass ma d'Stimma vu da Junga ziitig nutzt,
will's dia mit 18-i bimana Raserunfall putzt.

Will hüt a Mensch uf Ärda – raucht er no,
zum Biar in dr Beiz ais schlota – muass er's loo.
Ds Gsetz seit das isch jetzt immer aso,
wer raucha will muass usagoh.
Drby stoht in dr Bibla
muasch z'Unkrut brenna loh.

Sportlich si isch wichtig hüt uf dera Welt,
und wenn'd ganz sportlich bisch, verdiansch a Hufa Geld.
Dr Tiger Woods verdiant sis Geld, sisch absolut genial,
mit 18 Rasalöcher und verputzt's denn vaginal.

Dr Merz isch im Herbscht uf Lybia kho, in dicka höcha Busch.
Do kunnt denn dr Gadaffi drus und wot ihn schnappa – husch.
Er lauft so schnell er laufa kann, über Stock und Stei,
und flügt denn mit am Learjet zrugg – mit am Gepäck allei.
S'isch jo nur as klisas Träumli gsih,
Träumli sind jo doch so schnell vorbi.
S'isch jo nur as klisas Träumli gsih,
dass dia beida Geissla sind drby.

Wie kann ma z'Bern im Bundesroot dia drei Frau unterschaida?
z'Doris loot vor allam iahri Kühliauga weida.
d'Calmy Auga sind versteckt, dia müasst ma z'erschent enththora,
und d'Widmer-Schlumpf het Augadeckal wie zwai Sunnastora.

Dr Pfarrer vo Schwyz hirnat – wia bring i d’Kircha voll?
Er organisiert a Guggamess, das isch doch eifach toll.
Dr Bischof Vitus will im Bättschopf nur d’Eucharistie für üs,
Jo wenn’d so stur bisch Huonder – tanzand döt in 20 Jahr nu no d’Müüs.

Dr Ueli Murer frogt bim Bsuauch vo synar Truppa:
Jo guata n’Obad Kamarada, hets no Suppa?
Do frogt dr Kuchichef bim Ablick vo sinam Schnörri:
„Jo bruchand Sie darzua statt Löffel nit as Röhrl?“

Dr Bus vo Chur verkehrt uf Linia 1 verwickter,
und au d’Buschaufföra werdand immer gschickter.
Vor am Frohsinn-Engpass litzands d’Ohra hintara und stöhnd ufs Gas
Und hend bim Slalom um d’Passanta ihra Spass.

Im Altersheim do gsehsh si flissig Baschtla.
Si tüand an dünna Sperrholzplättli uma raschpla.
Si nähand Küssali und fülland si mit Spön,
so kunnts dr Staat den günschtiger wenn sie endlich göhn.

D’Prominenz het mittlerwila so iahri Tücka.
Zwüschad dura müand sich dia Grossa au amol bücka.
Dr Ratzi hends im Petersdom an Boda gworfa,
dr Cavalliere Berlusconi wird vom Dom vu Mailand troffa.

Frühnar bim Waldsterba händ miar, das het üs nit bissa,
dass d’Bäum nit verfrührand, üsari Fenschtar wyt ufgrissa.
Und hüt do löömar – das isch bis jetzt guat gloffa,
gega d’Klimaerwärmig – üsari Kühlschränk eifach offa.